

26 DEC 2001

Abdullah-Laporan

POLIS MULA SIASAT LAPORAN CUBAAN MEMBUNUH, KATA PAK LAH

KUANTAN, 26 Dis (Bernama) -- Timbalan Perdana Menteri Datuk Seri Abdullah Ahmad Badawi berkata polis telah memulakan siasatan berhubung laporan sebuah akhbar semalam kononnya ada percubaan untuk membunuh beliau dan Perdana Menteri Datuk Seri Dr Mahathir Mohamad.

Polis telah memulakan siasatan kerana laporan yang dibuat oleh akhbar itu dianggap sebagai satu maklumat, katanya.

Katanya, walaupun polis tidak mempunyai maklumat mengenai dakwaan itu: "Tetapi oleh sebab laporan itu telah dibuat sebuah akhbar tempatan, polis anggap (ia) satu bentuk maklumat yang mesti disiasat," katanya kepada pemberita selepas mendengar taklimat mengenai banjir di bilik gerakan Ops Banjir Ibu Pejabat Polis Kontingen Pahang di sini, hari ini.

Abdullah yang juga Menteri Dalam Negeri berkata pihak yang terbabit dalam membuat laporan itu perlulah memaklumkan kepada polis supaya tindakan segera dapat diambil.

"Saya berpendapat kalau pihak yang ada maklumat seperti itu, kalau betul ada, ia (adalah) serius, ia perlulah dimaklumkan kepada pihak polis supaya tindakan awal diambil," katanya.

"Kalau simpan maklumat itu dan tunggu masa tertentu baru nak disiarkan, ianya boleh berlaku sekiranya ada rancangan seumpama itu," katanya.

Abdullah juga berkata jika siasatan mendapati dakwaan itu tidak benar, siasatan akan dijalankan bagi mencari punca kenapa berita seperti itu disiarkan.

"Kalau tidak ada sebarang maklumat maknanya ini tidak betul, jadi mengapakah cerita seumpama ini dibuat, siapa yang mula buat cerita semacam ini?," tanyanya.

Beliau berkata cerita seperti itu tidak akan memberi kebaikan kepada kepada negara dan mungkin mewujudkan suasana tidak menyenangkan di kalangan rakyat dan menimbulkan macam-macam andaian.

Kementerian Dalam Negeri hari ini memanggil pengurusan akhbar The Sun berhubung laporan berita berkenaan.

Ketua Setiausaha kementerian itu Datuk Seri Aseh Che Mat berkata Ketua Pengarang Berita The Sun, Robert Ho telah menemui pegawai dari Bahagian Penerbitan KDN di pejabat bahagian itu di Putrajaya.

"Kita memanggilnya untuk tujuan mendapatkan penjelasan lanjut daripada pihak akhbar itu," katanya.

-- BERNAMA

MS MOZ